

Kantorei-Sommerfest, 12.Juli, 2017.

---



Hüt, am Kantorei-Sommerfescht,  
mit allne Sänger und de gladene Gäst,  
freuet mir eus am Zämmesi,  
wo jedes treit mit gueter Lune zum Glinge bi.



Fascht wie e Familie, han ich mir säge la,  
siget die Sänger, öb Frau oder Ma,  
wo unter de Leitig vom Bertschinger Urs,  
dä im Komponiere, Singe, Dirigiere wüerkli chunnt drus,  
richtig gekonnt, i de beschte Töne,  
eusi Gottesdienst tüend verschöne.



Grad wenn s'Chilelied unbekannt isch,  
würkt Eue Gsang asteckend und frisch,  
und beläbt de ganzi Gottesdienst für wahr!  
Ihr sind e Bericherig für eus alli, ganz klar!



Au tüend Ihr hie und da e ganzes Konzert zum Beschte gä,  
und mir dörfet das eifach als Gschenk entgäge näh,  
und gnüsse Eue schöni Gsang,  
wo Ihr dra güebt und gfiilet händ ganzi Abig lang.

Ich glaube es isch jetzt a de Zyt,  
dass es emal ganzes herzlichs Dankeschön git,  
für Eue Isatz für Eue Gsang,  
wo-n-Ihr, wie scho gseit, güebt händ defür lang,  
wo au Feststimmig lat la ufcho,  
und eus Zuehörer stimmt richtig froh.

Also, danke Ihr liebe Sängerlüt!  
Für Eu gits drum die Schoggi-Herz-Sänger-Medaille hüt!

Verena Schwentner-Staub.

